

Uthenga wakufumira kwa a Bishop Ryan pa Chaka cha Khrismasi

Monile mose wa Khristu, wa katukumeni na wanthu wose wa khumbo liwemi: muno mu Dayosizi ya Mzuzu. Chakwamba nkhumukhumbirani mose chaka chiwemi cha Khrismasi na chilimika chipsya chiwemi cha 2017.

Tingaluwanga kuti uthenga ukulu wa Khrismasi kwa ise tose ngwakuti: Chiuta wajikhutula, ndipo wajikhizga pakuzgoka munthu, mwakuti watithaske ise, ku zakwananga zithu. Chiuta wajikhizga pakubabika pakati pa wanthu wakavu: wakababika pakati pa wanthu wakwananga; pakati pa waliska. Yesu wababika mu chiwaya cha ngómbe, mu chakulyerapo ngómbe.

Mwawabale, awonani kujikhizga kwa mwana wa Chiuta: wakababika mu chakulyerapo cha ngómbe: ndipo wakafwira pa mphinjika ngeni muzga. Vyose ivi Chiuta wakachita mwakuti watithaske ise ku zakwananga zithu. Mwakuti watifumiske ise ku m'dima wa zakwananga na kutizgora ise tose kuwa wana wa Chiuta.

Yesu wakababika pakati pa wanthu awo mbakavu, pakukhumba kutisambizga tose kuti tikwenera kuzirwiska munthu waliyose. Ipo mu nyengo iyi, tilombere wanthu wakavu awo wakusowa wowwiri; kuti wasange chikhwimisko mwa Yesu; uyo wakababika ngeti mkavu ndipo wakafwa ngeti mkavu pa mphinjika. Tilombereso walwari muvipatala na muvikaya kuti wasange chisangulusko na wowwiri wenecho mwa Yesu. Tikulomberaso wanthu awo wali mu gadi, kuti waleke kutaya chigomezgo mwa Chiuta, kweni wagomezge Yesu uyo wababika kuti watithaske tose ku goliwoli la zakwananga. Tilombere wose awo wakusuzgika munthowa za kupamba-pambana, wachekulu, na wana walanda kuti wasange mtende na wowwiri wakufikapo mwa Yesu uyo wababika ku Betelehemu.

Mwawanyane, nyengo ya Khrismasi, yikutikumbuskaso kuti Yesu wakababika kuti wathaske vilengiwa ku chililo. Apapa Francesco mukalata yawo ya *Laudato Si*, wali kutikumbuska tose za uzirwi wa vilengiwa ivyo Chiuta walikutipa. Ise tose tili kupokera mlimo ukulu kufuma kwa

Chiuta; mlimo wakupwelerera vilengiwa vyake. Tikwenera kupwelerera viweto, nyama zakupambana pambana za mthengere, mapiri, madambo kweniso makuni. Vilengiwa n'vyakuzirwa chifukwa vikulongola na kuphala za uchindami wa iye mwene Chiuta. Kweniso, ise tawanthu tikukhalirana na vilengiwa vyose ndipo para vilengiwa vikufwasa nase tikufwasa. N'chacitima kuti vilengiwa vya Chiuta vikulira chifukwa cha nkharo zambula kwenelera za ise tawanthu. Lawiskani umo tikutondekera kupwelerera nkholongo yithu ya Chikangawa na nkholongo zinandi mchalo chithu ichi. Tikubuska moto uwo ukunanga makuni ghakulu na ghachoko uwo. Moto ukuwotchaso nyama zikulu zikulu na nyama zinandi zakukhwawa pasi, izo zingatchimbira yayi pala tabuska moto.

Pala tikunanga vilengiwa vya Chiuta, tikujinanga ise tekha kweniso tikutondeka kulondezga ntchilikizgo iyo tikapokera kufuma ka Papa Francis, uyo mukalata yake ya *Laudato Si* wakutisambizga tose kuti tikwenera kupwelerera vilengiwa vya Chiuta. Nkhupempha mose wa Khristu na wakatukumeni mu Diocese ya Mzuzu kuti titolepo lwande pakupwelerera vilengiwa vya Chiuta. Tipande makuni mu maparish, mu ma-zone, Out-station, matchalitchi ghithu ghakupambana pambana ndipo mu vikaya vithu na panyumba pithu. Makuni kose kose.

Ndipo kwa ise wimiliri wa mphala ya malango, na walongozgi wa chalo ichi; tiyeni tikolane mawoko pakovwira kupwelerera vilengiwa vya Chiuta.

Chinyake ntchakuti: nkhumupemphani mose kuti mujipwelerere makolo na kupwelerera wana mu nyengo iyi ya Khrismasi. Nyengo zinandi kukuwa zingozi pa nyengo iyi. Ipo lekani kumwa mowa mwa uchidakwa; lekani kwendeska galimoto pala mwalowera; ndipo lekani kugeza mu nyanja pala mwalowera. Pakuchita ntheura mungamanya kupewa ngozi.

Khrismasi ni chaka cha banja. Ipo wadada, wamama na wana; sangani nyengo yakukondwera pamoza na kulombera pamoza pa chaka ichi cha Khrismasi. Lekani kuluwa mazgo gha Ogastini Mutuwa ghakuti: Banja ilo likulombera pamoza, likukhara pamoza.

Nyengo ya Khrismasi ni nyengo yakuti tiwovwirane yumoza na mnyake; pakuti kachande kaderere kakunowa na kwendelana. Tiyeni tiwovwirane, chomene-chomene tiwovwire wachekulu, walanda, walulwari, awo wali mgadi, na wose awo wakusuzgika. mwakuti nawoso wakondwerere makola chaka ichi cha Khrismasi.

Mu chirimika chipsya 2017, muno mu diocese yithu tikukhumba kupanga Strategic Plan, plan iyo yingatiowira kuluta kunthazi na kutilongozga mu nchito zithu zakukhuzga diocese ya Mzuzu. Malayi professional (St Patricks Foundation) wakutiowira chomene pa nkhani iyi. Tiyeni tose takolelanako pa nchito zose izi kuti diocese yithu yiwe ya nkhangono. Tilombe kuti tose tiwe pamoza mu mauteveti ghakupambana pambana mu chaka cha 2017.

Tilombereso Apapa Francesco, ma Bishopu ghithu ghose muno m'Malawi, na ine nane munilombereko mteweti na Bishopu winu kuno ku Dayosizi ya Mzuzu, wa Sembe, wamayi, wa bulazala, wagulupa, walongozgi withu wose, wakristu wose, wa katukumeni, na wanthu wose wakhumbo liwemi.

Mwapadera tilombere mlongozgi withu, Professor Arthur Peter Muthalika kuti Chiuta wamuwovwire kwendeska chalo ichi kwakuyana na khumbiro la Chiuta, mwakuti pawevwe kwiba, kusankhana mitundu, na kutinkhana mchalo chithu ichi. Pa umaliro nkhumukhumbirani mose chaka chiwemi cha khrismasi na chilimika chipsya chiwemi cha 2017. Chiuta wa nkhangono zose wamtuwiskeni: Wadada, na mwana, na Mzimu Mutuwa. Amen